

地 310.19

41

17

313.25

4-91



永泰縣志

卷之

拾玖



列傳

水之靈者神龍所窟地之靈者人傑斯出山川孕育郁郁麟麟雙溪之區間生偉人好學深思並世無對政教覃敷聲施宇內母曰葛爾鄙夷不屑彬彬君子與上國埒纂列傳第二十五

唐

葉翹博學質直王延鈞擢爲繼鵬友官六軍判官命繼鵬以師傅禮待之繼鵬嗣位進翹內宣徽院使叅政事繼鵬漸驕縱不與翹謀議一日方視朝翹衣道士衣過庭中繼鵬召還曰軍國事殷久不接對孤之過也翹對曰老臣輔導無狀致陛下無一善可稱願乞骸骨繼鵬曰先帝以孤屬公政令不善公當極言奈何棄孤去厚

永泰縣志

卷九

列傳

一

賜金帛慰之元妃梁國夫人者李勉女也賢妃李春鶯被寵夫人頗不見答於繼鵬翹諫曰夫人先帝之甥也陛下聘以禮奈何因新愛而棄之如遺乎繼鵬不從未幾翹復上書言事遂批其疏曰春色曾看紫陌頭亂紅飛盡不禁秋人情自厭芳華歇一葉隨風落御溝放歸永福以壽終(見十國春秋金鳳外傳)

宋

張肩孟字醇叟月洲人皇祐五年進士授程鄉縣尉通判歙州所至有善政勇於及物嗇於營己官終朝奉郎子勸勗勸俱成進士(見乾叟雜著)

黃遠字明仲登紹聖丁丑何昌言榜進士慶歷間任莆田令有廉聲



嘗解心經行於世(通志)

黃龜年字德邵

(寧波府志) 作字子紹

麟峰人家於縣城北虹井街崇寧五年進

士官河北西路提舉入為太常博士呂頤浩見而奇之靖康中除吏部員外郎轉監察御史尚書左司員外郎中書門下檢正諸房公事充修政局檢討官遷殿中侍御史時秦檜超拜右相舉朝猶未知其奸胡安國亦薦檜賢龜年獨首論劾檜專主和議沮止恢復植黨專權漸不可長上乃罷檜與祠並劾檜黨王曠王昞王守道等罷之先後章凡數上檜深憾之遷起居舍人兼給事中為侍御史常同所攻罷歸紹興中檜再相司諫詹大方希檜意又論龜年落職尋卒於家年六十三祀鄉賢英宗御製五倫書亦取其劾

永泰縣志

卷九

列傳

一一

秦檜語載臣道篇以風勵天下龜年微時永福簿李朝旌奇之許妻以女及登第朝旌已死家貧甚或勸別娶龜年正色曰吾許以諾死而負之何以自立卒娶焉

(游宦紀聞) 以此為鄭僑事

任子恩先官其弟之

子人皆義之子衡仕至湖南提舉(參通志舊志)

梁巖老字允濟初名汝霖政和中擢第靖康間金人犯闕巖老佐尙書蔡懋守京城北壁有勞明年奉使赴金欲臣之不屈幽之荒寺月給飲食食餘輒私晒復留飲漬其壁壁壞乃挾餘糗南奔日伏草莽夜望星斗全節而歸高宗嘉之除直秘閣知泉州 (參通志

舊志)

吳元美字重寶

一作仲突

宣和中進士紹興間歷太常寺簿出為福建按



察司主管機宜文字嘗作夏二子傳其畧云天以商代夏是以伊尹相湯伐桀聲其刻剝之罪當是時清商颺起義氣播揚勁風四掃宇宙清廓夏告終於鳴條二子之族皆望風殄滅殆無遺類天下之民始得安席酣飲而鼓舞於清世矣夏二子蓋蚊蠅也其鄉人進士鄭瑋得之白於秦檜訴元美譏毀大臣又謂其家亭號潛光有心於黨李堂名商隱無意於事秦檜下有司論死高宗特宥之除名容州編管再謫南雄以死後二年楊椿洪遵等爲言於朝特命官其子（參舊志尙友錄蟬巢集）

張淵字叔潛隆興元年第乾淳間有儒學名人稱爲張夫子壽皇愛其才擢就館閣歷知數郡清廉自守多惠政於民（舊志）

永泰縣志

卷九

列傳

三

陳表臣字正甫乾道中擢武舉知宜州經畧張玠誣韋文仲等六十四人以寇邊欲置之死表臣知其非辜必盡出之忿爭未決賦詩自壯云世事須權重與輕莫臨利害便心驚但知折獄能無枉便到糜軀也合爭富貴信從生處有是非總要後來明若教無罪俱蒙戮我亦何顏度此生文仲等竟得活爲政以循良稱（參閩書通志正德府志舊志）

鄭僑字惠叔龜嶺人乾道五年舉進士第一

廷試時有司奏僑策第一二孝宗覽而異之擢第

一除著作郎兼國子實錄院屬吏部司封介然靜重自守不一至執政之門簽書鎮南軍節度判官歲飢講求荒政轉淮浙常平官請米四萬石以繼常平之乏以左氏春秋侍講東宮爲陳大義而



尤拳拳於君臣父子君子小人之際會高宗崩孝宗在德壽宮有欲表請還內者僑曰喪不離次禮也今雖不克如古詎可專以此請第以聽政爲詞則善矣出知建寧以公錢爲下邑代夏輸又力請蠲諸縣版帳之太重者紹熙中移福州減古田重稅罷義倉和糴光宗爲語胡正臣曰使人人如僑民力其少紓乎慶元初除本路安撫使再知州事遷給事中婉容陳氏父以墨詔遷官僑封還之又論指揮使郭埭交通殖貨之罪充金國賀正使時金主寢疾令使人就東上閣門進書僑曰東上閣門臣僚集表章之地某持皇帝書來乃以此投進耶自朝爭至日中聲色愈厲及暮乃傳命遣歸入見嘉獎寧宗卽位參知政事兼知樞密院事以老辭位寧

宗手書牘尾曰忠誠重厚朕所倚毗累丐退閒殊拂眷意章再上以觀文殿大學士致仕卒贈太師諡忠惠生平端重孝友無他嗜好不市恩不干譽不立黨不私好惡受知三朝見稱忠實祀鄉賢子寅另傳(參續通志尙友錄舊志)

黃揆字端甫乾道五年進士淳熙間任莆田主簿改知尤溪縣爲人勤敏濟以仁厚時縣乘累年弊政之後困匱不支揆理財撫民不爲表暴家給人足而田里相安陞知瓊州民爲立生祠於福星堂官終安撫使(見閩書萬姓統譜)

黃定字泰之龜年再從子也乾道壬辰對策謂以大有爲之時爲改過之日月又云雖有無我之量而累於自喜雖有知人之明而累



於自是何不因羣情之所共違而察一己之所獨嚮言甚切直上親擢爲第一累官知潮州爲政務剗弊蘇瘵撥官田以贍士潮民德之官終國子祭酒直顯謨閣廣東提舉有集行世祀鄉賢子自求另傳(舊志)

李若水紹熙間武舉特奏名寶祐中知龍川縣脩頽宮繕倉庫築城池寬猛相濟民像祀之(通志)

黃自求字熙叟定子兩請監舉淳熙十五年奏補迪功郎大理寺丞嘉定間知潮州撥方宜等田於學以養士潮守之賢者丁允元陳宏規爲最自求與之齊名同父定稱賢守祀潮州名宦(叅閩書潮州府志舊志)

永泰縣志

卷九

列傳

五

林學蒙字正卿一名羽從朱文公學築室龍門灘下講明道德性命

之旨鄉人皆師事之

舊志晦翁與正卿書云季通書來亦謂正卿甚進不知乃有異論如此正是渠受病處蓋

不先其在己而欲廣求於外所以不甚得力又不察學者才識高下而概欲其無不知所以悞得他人亦多馳騫於外吾人當識其好處而畧其所偏也聞渠謫居却能自適亦甚不易正不須問旬程亦不必求免如陳了翁曾作諫官及被謫猶着白布衫繫麻鞋赴旬程朝廷行遣罪人正欲以困辱之若必求免是不受君命也不受君命是不受天命也而可乎細玩書中語意按之正卿身世却不類又似非直與正卿言者附注於此以備續攷

後卒業黃幹之門幹爲作龍門記陳宓

守延平時作道南書院聘學蒙爲學長諸弟子執經座下者百餘人後宓官滿學蒙引歸生平識趣高明文足以發義理行足以激貪懦環居種梅自適有梅塢集傳於世祀鄉賢弟學履字安卿與羽同學於朱文公之門著有己未問答其九世孫儀字正夫又字



意齋亦以道學自命著永陽清氣錄紀邑中故實核而詳云（舊志叅道南源委）

林宋偉字力叟在太學時袁公燮無罪而與羣小同被孽言去國士論不平宋偉送詩有云韓非老子俱同傳乞與時人子細看之句詩出名震輦下擢嘉定進士累佐浙幕平金有功嘗督兵討沅溪蠻草捷檄文氣甚壯爲時論所稱當時削平猺洞二十一所破賊寨一十一所降賊黨一千五百餘人移吉州倅進湖北運判廣東提刑自號橘園居士（舊志）

鄭寅字子敬僑子以父任補官歷知吉州入對言濟邸寃狀指斥權臣端平初召爲左司郎中兼樞密副都承旨又請爲濟邸立廟且

言三邊無備宿患未除宜正綱紀抑僥倖裁濫賞汰冗兵以張國勢竟以執法守正出知漳州除直寶章閣致仕寅靜重博洽多識典故家所藏書分爲七畧曰經曰史曰子曰藝曰方伎曰文曰類真德秀李燔陳宓皆與爲友燔嘗疏薦海內名士十二人寅其一云孫杓見儒林（叅續通志舊志）

張增善字子克賓州學正教人務爲實學士心歸之（通志）元

林泉生字清源天歷中進士授福清州同知轉泉州經歷漳州推官擢知福清州累官翰林直學士知制誥卒諡文敏泉生遂於春秋工詩文多權畧有將帥才前後在福清屢建武功始爲同知適巨



寇劫掠山海以計殲之及爲守會紅巾寇連江帥府檄泉生禦之  
乃創保甲置屯柵誅鹽丁謀亂者七人捕殺長樂謀爲內應者三  
十餘人先發制之賊驚潰又善聽訟悉物情泉民負酒稅者多瘦  
死泉生至悉破械出之令私釀者代償司理漳州畚洞相戒勿犯  
福清俗好訟多殺孤幼以誣人求直泉生立連逮親隣法民不敢  
犯著有春秋論斷及覺是集(通志)按舊志林傳多有失察之處曰同知福寧州曰知福州於福清

宦績不一叙及今依通志錄入

明

林惟賢洪武十六年以明經薦至京授池州府推官爲政嚴明廉斷  
人不敢干以私用刑平允考績者以狀聞明太祖嘉之勅賜御酒

永泰縣志

卷九

列傳

七

附名大誥續編(舊志)

張惟康洪武中由選舉任武強知縣爲政廉慈有幹畧大得民心及  
代去民頌之不置(舊志)

方員字懋規宣德八年進士以行人選御史歷廣東叅政官終廣東  
按察使員嚴於持己在廣久精法律多惠政(舊志)

廖泰字侗人幼失怙恃事王父母至孝讀書必研求聖賢語言真實  
所在以體諸己見八股浮詞喟然曰所謂隔靴搔癢與吾人身心  
事業有何干涉遂絕意進取獨取周易小學性理諸書專心精究  
以求無忝所生初以主敬爲宗端步趨慎笑語非禮之聲色不接  
於耳目久之確然有得分晰於理欲人禽之界操之甚嚴輯性理



粹語立統分目令後學易解又畫敬天圖間爲詩歌寫懷後燬於火遂以聖脩無事煩言不復紀錄祖母奄歿喪必盡禮哀毀骨立祖又年老家貧拮据承歡笑值時世滄桑遯跡深山幅巾裹首深處房櫺不復與塵事接嘗誨其子曰易經妙理大含細入須理會透徹令其有得於心世雖亂吾心不可不治任世變紛紜愈當讀書書以正人心致太平之本也世道之亂實由吾輩不知讀眞書求實學惟以虛文浮名釀成世變今日至此良可惶愧有志者務求眞實根本以存其心以合乎天不爲罔生幸免庶其可耳子全仁全禮見獨行(舊志)

王銘字日新以廩生應正統己未歲薦故事歲薦者遊太學以序除

府佐縣正或州縣佐貳不然斬恩就學官將入京懋規方公送諸道進曰自科貢分途朝廷以資格束士久矣大吏緣此爲厚薄列薦章者什九皆科第而彈劾往往在明經一途是尙可以行志耶先生其就學官哉退食則明道術成一家之言升館則進多士講性命之學宏作人之化使他日各有成立足爲世輕重而吾道且因以行是猶可爲耳銘退語人曰豪傑生世日擊時艱而不一引手非夫也竟入太學越九年戊辰授英德知縣下車首修學宮申飭鄉約濬西河渠爲民興水利廣闢空閑地招撫流移政以平賦以輕遠邇嘖嘖頌眞父母然以抗直孤立無援附會上峰者復媒孽其後卒如方言被劾歸(見王氏家譜)



張鏡字孟輝幼而警敏弱冠領鄉薦授南安府學訓導

張氏譜作郡南康府學

守聘於白鹿洞講易一郡之士皆師之登成化戊戌進士除歸安縣知縣剗宿弊抑豪強發奸摘伏政聲爲兩浙最以內艱歸家廬墓而卒(舊志)

陳夔字惟一龍湘人宏治間由歲貢任龍江衛經歷以廉仁著會隣境賊侵軼郡界勢甚猖獗監司遣夔率羸卒數百拒之卒皆股栗思潰賊聞夔將兵相與議曰陳經歷仁厚君子也戰必覆其衆吾不忍也乃釋圍而遁監司薦於朝得褒獎贈其父母夔解官歸家山賊意其當有厚橐刦質之以責贖時方篤寒而夔裏衣皆苧葛賊大笑釋之(舊志)

永泰縣志

卷九

列傳

九

董璣字汝器三都大樟人性嚴毅居家不苟然諾嘖笑每應接無大小衆寡執禮弗怠由歲貢知電白縣廉以律己仁以愛人蒞政不煩民得安堵居處有常盛暑不去公服然梗介特立不能與時俯仰後以疾告休民不忍舍祀電白名宦(舊志)

王克立原名鑽以字行號雲巖赤岸人年十二哭從兄銘云家有元方難作弟文無蘇轍可銘兄爲人伉爽博大不爭瑣屑事無巨細當機應節靡不畫然嘉靖庚子貢成均司訓肅寧調廬陵教諭改治學舍祠歐陽文忠館諸生於其側而教之聲稱籍甚己酉尹肅寧熟路重經加意撫綏請蠲請賑屢以牘上有巨盜羅雲者與鹽梟朋比爲奸白晝剽刦公差不能禁監司檄前令捕之弗獲克立



下車募丐兒之黠者使誦雲不浹旬掩執之肅連歲苦旱課額數千金追呼無寧日克立爭之得可而後已訟無贖錢日用一資之囊中而大吏供費亦以已資應之防兵千餘缺糧譁噪肅且旦夕憂不保克立縋城下慰解之復出囊金數百轉輸買米以濟餉之不給民賴以安(見王氏家譜)

林宏祖號無念崇禎癸酉舉人知鬱林州時方有墾田之役弊端叢委當事者欲速其成宏祖寬限而審覈之宿弊盡釐卒以就緒山賊謝正奇倡亂宏祖召兵勦賊搗其巢羣賊解散民立祠祀之著有味其草詩集(舊志參林氏家譜)

劉拯字以仁由舉人爲新淦令嘗因漕蠹侵折運挽不前力請民徵

永泰縣志

卷九 列傳

十

官解一時便之崇禎中流寇充斥淦城卑小拯加高數尺尤銳意文教置學田修敬一亭文昌閣黃勉齋祠士興於學以陞任去

見江西通志福州府志

按永福明末舉人無此名未知是  
否舊志遺漏或係廣西永福再攷

清

黃國塾字珣玉號疊侯白雲人少好學足不出戶順治甲午舉於鄉歷知浙江蘭谿湖廣桃源等縣性慈厚不得已而用刑必掩面流涕邑民德之解組後對子姪無忤容享林泉之樂者十九年而卒有萍實草(見黃氏家譜)

張瑞俊字啓藻順治丁酉舉人時有奏銷之牘註誤者衆瑞俊伏闕上書訟冤經廷杖四十詔三法司訊問得雪直省舉人悉予開復



後授無錫縣知縣未到任卒(舊志)

江景陽號心葵莒口人舉乾隆己酉鄉試大挑雲南知縣署臨安分府劍州昆陽新興陸涼等州知宜良縣所至有政聲昆陽諸生激變縣袒所屬景陽抵任分別審理開釋無辜州田苦旱爲疏通溝洫捐俸築堤種柳其上民利賴之名曰江公堤宜良有堤年久淤塞南北屯因爭墾傷斃多人景陽至毀新墾以蘇北屯之困復故道以安南屯之心在官二十年惠政循聲口碑載道兩充同考官所得士多淹通賅洽張庶常誠徐民部青其卓卓者江左名士李復見而嘆曰君文章政事卓然可傳同邑張馨贈詩云果然循吏由循儒慎勤廉正羣謹呼江公堤上穹碑立興利不特昆陽湖

全詩

永泰縣志

卷九

列傳

十一

見藝文

林文忠公手撰贈句云常持清節居官苦共賞奇文說士甘

張馨號蘭谷又號蘭石丹洋人長考據工選體文章氣節壁立千仞而接其容溫然以和藹然其可親弱冠舉嘉慶初孝廉家貧授徒者垂三十年從之遊者後先登科第晚知商水縣語其幕王某曰理民如理苗欲苗之秀必先去其害苗者故意在煦嫗振刷先焉諏咨民瘼起便除害邑無問士庶寡有賙斃有恤鰥有娶以至籲神澍馴桀鷲清丈田稅以汰宿弊積年駟僮無敢窺牟以勞終任所子鴻荃毀齒卽知爲文負重名既成進士閒遠疎曠不樂仕進孫應嵩舉人應熙副貢應鑣應愷諸生(見斲輪集)

江文池號蕙生莒口人以舉人大挑得二等歷署松溪泰甯浦城福



鼎學篆廉正自守以振興文教爲己任所至必語人曰黃老浮屠學不忘本建治塔廟朝夕禮敬事之若生窮山僻野皆其黨人不知其幾千萬數而吾夫子之門無一二觀之媿縮者祭獻之禮雖存尊奉之意殊闕蹈道服儒而叛其本先儒所謂食母令腴者是人哉福鼎文廟初建於乾隆初年未有祭器樂器春秋兩丁以木器代之率殘缺不完文池捐廉集資募銅匠遵欽定禮器圖欵式務在堅樸以圖久遠舉子弟誠篤者得數十人如額充佾舞有武士因案株累窘於邑役士紳公憤忤大令文池宛轉脫之太學某侵蝕公款恐洩先發制人誣族人以他事文池廉其情斥令罷某素倔强不之聽賂邑宰上瀆列憲族人幾不得直矣卒以文池言

免於戾弟文河歲貢生從余畊郵遊有心得

鄔必興號聞亭麟洋人嘉慶己卯舉人五試春官以大挑一等報罷攝湖北興山縣篆邑簡而民瘠敝裘脫粟晏如也三載補鄖西號稱難治有世襲守備者猾且黠士民側目前令莫之撻必興下車因事獲之一鞠得其情卽詳辦褫職又俗素獷悍巨奸魁盜所在多有必興明察而斷廉公有威匪皆竄跡甫逾半載積勞不起扶櫬出城奠醮者沿途不絕云(見鄔氏家譜)

力變布衣喜談經濟能文章嘉慶十四年河決具節畧數千言請復故道呈戶部代奏摺留中事實見林敬廬石介堂語錄生平所著有燕游草二卷山居雜志四卷山左金石題跋二卷七音彙考十



六卷河上芻言四卷

余潛士字時纘號畊邨輔弼人道光紀元徵孝廉方正不就以拔貢舉癸卯鄉試有志宋五子之學受知於沈鼎甫陳恭甫諸先生與林敬廬陳惕園謝退谷何道甫交最深敬廬喜講宋儒章句勝其讀書處曰君子齋年八十餘與同志立講學會畊邨與焉初畊邨年最少肄業鼇峰制軍汪稼門取畊邨讀小學二律懸之鑑亭令諸生能熟讀小學而著爲論者列上考建甯張亨甫素倔强見畊邨亦禮下之後館郡中魏氏之壽泉精舍生平博覽羣書問者各如其意以去一日都人士應觀風試題旨茫然質諸宿學亦罔有知之者畊邨檢朱子大學序示之旁觀嘆服所著有居官臆測困

永泰縣志

卷九

列傳

十二

學邇言教學編姑留草北遊草自鳴集行世祀鄉賢

張榮字正中縣治人邑明經學有淵源才氣亦豪邁橫絕一時歷任歸化同安教諭道咸間海內多事下游一帶土匪颺發榮臥病已旬日矣聞警同邑令力疾守陴地方卒賴以全丁艱歸送者塞途居恆時以冷官不獲施其抱負爲歎孫瞻淇歲貢性嚴重克承家學

江應奎字自敷號次躔莒口人咸豐己未舉人幼承庭訓品學兼優文章道誼同輩奉爲楷模恆課讀龍山負笈者隣郡畢至門徒稱盛一時任建甯府學訓導歷署漳州訓導平和漳平甯洋教諭訓導文旌所駐教澤一新



黃紀官號雲卿咸豐間舉孝廉家貧授徒於外往返未嘗踰尺寸里之居者聞履聲知爲黃某也教人先器識而後文藝行止偏僻者正之識趣卑鄙者廣之其庸魯鈍劣者未嘗苛責之曰余性固拙過來人自不憚煩耳有詩集未梓

江匯號藹邨莒口人文鎡子咸豐辛酉拔貢同治乙丑朝考擢一第一名陞見以七品小京官用籤分刑部奉天司行走假旋會同前甯紹台道梁敬叔觀察募團堵匪以勞叙五品銜沈文肅公督辦馬江船政詢人材於吳航陳蕤陳答以有永福江某者他事吾未知但以一部員居僻壤貧乏不能自存致乏貲入京供職其立品可知矣乃委匯以版築所工程監督旋掌支應文案等務保同知

永泰縣志

卷九

列傳

十四

清軍分府用卒年三十八沈以積勞病故專摺請卹光緒丙子吏部議覆五品銜刑部七品小京官江匯照五品官軍營病故例加贈知府銜給卹銀四十兩至七品小京官病故例無議卹專條應比照庶吉士成案辦理廕一子入監讀書期滿以縣主簿注册候銓奉旨依議

謝維椿號少梅縣治人同治丁卯舉於鄉廉隅自厲不可干以私掌教景行書院語門人曰學覺也士類處而講說之求以覺此心焉已耳是故善學者充吾本然有覺之心以行於君臣父子兄弟夫婦朋友之間各中其則故曰書院者學宮之翼也非然者諸生於家容膝之地閉戶可以自精雖學宮可虛也奚書院也歟哉先後



二十年名儒碩彥半出門下有富室與里豪訟不得直以謝素爲大令重囑其戚某賄以三百金力却之有與其濁飽毋寧清飢之語一時傳爲至論初授延平教授繼任大田訓導每月課諸生飲食教誨恩義兼至尋改漳浦教諭年老不果行卒年六十七素不作詩易筭時忽有乘風一笑翩然去只見瓊樓玉宇寒吟畢端坐而逝

張定遠號子廉光緒間歲貢謹厚嚴重出於性成望者恆畏而愛之授館省垣二十年是時謝枚如主講致用極器重之曰此吾老友也生平究心宋儒性理見義尤所勇爲先是邑中女紅少生活定遠倡舉織局不數年機聲軋軋相應福布遂馳名於時候轄陽岐

永泰縣志

卷九

列傳

十五

鄉爲晉省往來孔道過其地者土豪索買道錢成爲常例定遠率同人訴諸撫憲岑公此風遂革其他義舉多稱是著倚松廬詩存六卷雜存二卷又治身治家格言若干卷散佚不傳子瑞珏另傳林捷鼇號卓峰箕坑人光緒己丑北上挾強弓大矢驅一衛獨行有賊窺其橐笑曰若利吾有乎吾與若鬪射約退百步外執號箭爲的不中聽若取之一發破其幹以武經中式會魁授花翎侍衛乾清門行走故與尙書陳璧爲葭莩親璧廉知其能欲引爲心腹乃在都供職數年一見其人不可得兄捷元癸未武進士署福甯右營陸提前營與同輩倡設北關外義渡人至今賴之

張瑞珏號汀漁定遠子以明經考職縣丞分發浙江嚴氣正性治古



文有法得力於庭訓居多與閩縣何梅生林向其友善結脊誠社  
同受知於謝枚如聲譽籍甚家綦貧而好善舉嘗讀書烏麓夜登  
道山聞破屋中哭聲甚哀詢之知爲債者索負急將鬻女者歸貸  
貲償之族人闢圃得古甕以爲金也夜抱歸發視則朽骸數片已  
耳棄之墻陬珏廉知之典衣埋其骨性尤嗜讀聽鼓劄東猶手一  
編寒暑罔懈所作詩文零章斷句多膾炙人口



論曰天下事適然而傳者非其所必傳者也非其所必傳則其傳也易而其視所傳也輕傳之者以無足關繫而忽之傳所傳者亦以不足貴重而忘之故曰物以罕而見珍事以難能而可貴也夫世所謂卓卓必傳者不必皆佐天子號令賞罰於明堂俾遠至邇安比隆三代也亦不必筭兵走萬里立功海外使氍毹毳結之區聽鼓鞀瞭烽燧神悚色譴也卽此界之邑而邑治界之郡而郡治界之戎界之旅而一成一旅亦罔不治出身加民撫烝黎如乳雛嬰拔戟成隊殲巨寇若驅羣羊極之闡微言綿墜緒下學而上達居易以俟命求底於聖賢之歸綜其大要表正者固景不邪卽舉其緒餘枝豐者亦幹必固所負愈大則自顧愈重自顧愈重則其

品益高古之人立名不朽其非適然之數明矣鳳凰芝草賢愚皆以爲美瑞青天白日奴隸亦知其清明譬之食物遐方異味則有嗜者有不嗜者至於稻也梁也膾也炙也豈聞有不嗜者哉蓋嘗攷之孟荀道學韓彭武功列傳之作司馬氏已開其先吾永區區百里間先哲之文章經濟可以風厲當世而興起後來者史不絕書邑里之榮亦志乘之光已山川孕育炳炳麟麟道德政事冠世之英立邑以來所培養而薰陶之者有加靡已賢士大夫景前徽儀往躅皆期踐其聲以揚於世蓋士有學有養而後其言行可觀有行有言而後其學養可貴此固立身行道次第始末之常而不可易者雖所稟不同所遭或異得於心者無以驗其事成於終者



無以考其初而國史之紀載里巷之傳述舉足以存先正之大者  
世之君子雖未知鄉先生之全觀於茲傳亦可以得其概矣

永泰縣志

卷九

列傳



儒林傳

圖書既演聖蘊啓局闡發微言頓悟窈冥體之在我如寐忽醒天根  
月窟默契性靈古稱筆削游夏莫贊後之作者縷析條貫一字一解  
析疑辨難蔚然經籍其光璀璨纂儒林傳第二十六

宋

蕭國樑字挺之獅峰人乾道二年擢進士第一歷著作太子侍講兼  
禮部郎官終朝奉郎廣東運判初國樑登第時第一人本趙汝愚  
故事設科以待草茅凡豫屬籍挂仕版者法當遜避唱名之日陞  
國樑爲榜首故對御詩名傳玉陛星辰曉澤沛金芝雨露春之句  
及謝啓云豫龍飛之選淮安序次已當先無汗馬之勞鄼侯何功

永泰縣志

卷九

儒林傳

十九

而居上至今膾炙人口有集十一種行世祀鄉賢祠(參舊志)

鄭杓字子經寅孫嘉定中辟南安教諭與陳旅爲文字友嘗著春秋  
解義覽古編次夾漈餘聲樂府又有衍極五篇衍極記載三篇其  
書自蒼頡迄蒙古凡古文籀隸以及書法之變皆在所論陶鎔歷  
代之偏駁會歸一藝之純粹福建宣撫使齊伯亨采而上之卽城  
東第宅作衍極堂以藏其書子燁見方技(閩書)

明

黃文煥字維章號坤五白雲人天啓乙丑進士爲文淹博無涯淡初  
令番禺及潮之海陽有政聲今潮州府志載文煥負大文名一時  
士風不變云云崇禎間再補淮之山陽時流寇陷江北安民固圉



備芻糗挽漕河有功召御試擢翰林院編脩黃道周以論楊嗣昌  
陳新甲獲罪逮問詞連文煥遂與道周同下詔獄獄中箋注楚詞  
聽直八卷陶詩析義二卷既釋獄乞身歸里別道周詩云自聞鉤  
黨獨行憂痛哭批鱗泪未休欲格君心甘濺血不教漢祚付清流  
雷霆息怒天回笑生死移時我掉頭今日全驅同去國莫將厨俊  
傲林邱後寓居金陵卜築鐘山之畔著有四書詩經鄉嬛毛詩箋  
易釋書繹老莊注杜詩注秦漢文評顏留集館閣詩文稿子璉見  
文苑瑣歲貢生大田訓導（舊志參黃氏家譜）

清

黃世華白雲人清修力學屢舉不第以恩貢老於家爲詩文清切平

永泰縣志

卷九

儒林傳

二十一

易不尙雕飾著四書體註補遺禮記集解史評竹窗詩文章客非  
其類不接日與窮經之士參訂所疑

黃步雲白雲人性淵默不苟言笑雅有文名尤長考據乾隆甲寅舉  
於鄉司政和教鐸著書經纂要講義五卷

鄔調元號梅峰麟洋人幼耽書方冠中嘉慶戊午副車後累薦不售  
而嗜古之心終身如一司教泰甯淡泊自甘依然斷齷風味諸生  
接見勗以讀書循分勿干外事以興建考棚得旨加六品頂戴在  
署十餘年日與簡編相對輟易解大學衍義十閩名勝箋行世（  
見鄔氏家譜）

林紹蒼字壽士號也山縣治人以優貢登嘉慶戊午鄉榜謁選得學



博歷任順昌秦甯教諭以病卒於官紹蒼天懷澹宕與世無競冲夷之度上可方之靖節所爲詩饒有逸致尙傳其除夕舊作不得不愁愁不得開門踏雪看梅花之句字學蘭亭得其神似本鬱林州知州無念先生之後傳其家學而益有聲趙鹿泉侍郎深器之著作甚富惜家無傳人其稿多散佚當時與也山齊名曰爲三博士一陳應魁一余潛士

陳應魁號憲窩縣治人家貧甚無力購書恆借書而讀比長博極羣書由恩貢應道光丙午鄉試恩賜舉人嘗就館趙穀士家孑然一身已耳門者詢云陳先生遠來携有書篋否魁以手鼓腹曰此中便便卽經笥也與閩縣何郊海善郊海狂名震海內見憲窩香草

箋亦心折之以爲可與施德初李雁湖惠松厓諸家並驅爭先生平所著有三禮述存讀左會心四書管見經濟大畧憲窩策存禮記質疑三傳考異等書已梓者有香草齋詩註



論曰周秦以來有著書無注書或謂爾雅爲詩經注者特意擬之辭耳經之有注自漢儒始熟讀而強探精擇而詳語俾六經之旨如登千仞之巔八窗玲瓏四面洞達而凡高山大川平原曠野俱在俯視之下淮南子不云乎劍工惑劍之似莫邪者唯歐冶能名其種玉工惑玉之似碧盧者唯猗頓不失其情人患吾載道之文不如莫邪碧盧矣百世而後豈無歐冶猗頓其人者堯舜禹湯治天下養叔治射庖丁治牛師曠治音聲扁鵲治病僚之於丸秋之於弈伯倫之於酒終身樂之與之爲一使後世稱曰某人善某事某事宜某人若屈伸指而數庭樹彼徒襲皮毛者項背相望皆不造其堂不啻其馘者也則甚矣傳經之難也夫經者聖賢不得已

而有言筆之於書以垂後世隨時有作不能盡同故孟氏之文不盡同於孔氏孔氏之文不盡同於周公雖其並世而生會聚於一堂之上其精神氣象亦自不同况筆之於書以垂後世者乎雖然有大義焉如天之位於上地之位於下同此不可倒而置也有微言焉如玉之韞於山珠之涵於淵同此不可淺以獲也極之於小而食息步趨之節推求之而同得所安也擴之於大而經邦制遠之猷引伸之而同盡其用也研之於深而保合變化之真實體之而同立厥誠也酸鹹不同而口所甘苦與易牙同肥瘠不同而目所妍媸與離婁同體用不同而心所是非與聖人同其歧異焉者必心之於道不能如口之於味目之於色之誠切也顯之於所藏



達之於所推証其所得於常人之心驗其所能於可爲之事是食  
味辨色者細狀其酸鹹肥瘠也是譚味論色者曲肖其酸鹹肥瘠  
也浸假而肆力探索尙欠熨貼浸假而割斷字句尙欠貫串其高  
者不過古人影子下者已背而馳且用古句爲訓釋而經之義竟  
晦所謂莊周注郭象非郭象注莊周也因傳儒林而述之無虛美  
無繁稱俾後之輯志者有所稽云



文苑傳

南音要眇北學深蕪操觚握槩厥製攸殊咬文嚼字咏歌盈筥浥水于河取火于燧言由中出鼓舞軒戛或陰而柔或陽而剛如玉之瑩如金之鍊揚聲雲漢由此其選纂文苑傳第二十七

宋

張勔字臻道父肩孟皇祐五年進士勔兄弟五人相繼登第知名當

世所居有半月洲一日座客欲咏之未就勔時六歲即誦唐人詩

誰把玉環分兩片半沈滄海半浮空之句客盡驚嘆今攷其地溪流如月字形

祖屋兩區適當中間兩點處所故只名月洲又嘗為聚蚊賦以譏姦黨是以不容於世

仕至朝散郎(舊志)

永泰縣志

卷九

文苑傳

一二十四

黃邦俊字宋英遠子政和三年壬辰進士累遷大理寺丞出知英州

舊志作莫州通志作賀州閩書作冀州萬姓統譜福州府志俱作英州著有真陽共理集二卷胥訓

誥文三卷史論四卷強記集八卷(舊志參閩書萬姓統譜通志

府志)

黃邦光字宋煦各志俱作宋顯邦俊弟大觀二年戊子請舉登三年己丑賈

安宅榜進士通判徽州建陽志載紹興間任建陽官朝散大夫所著有羣史姓

纂韻譜六卷凡史傳所有姓氏皆以韻聚而著其所出舊志作邦俊著誤

(舊志參閩書直齋書錄)

明

王偁字孟敷號密齋潮州總管翰子翰死偁方七歲母劉守節手疏



先人遺蹟與古今豪傑大畧教之從父友吳海學繼與董江陳從  
範遊學愈進洪武庚午領鄉薦爲國子監上表乞終養南歸所交  
遊皆一時名士母沒居喪毀瘠廬墓六年永樂初以薦至京授翰  
林檢討進講經筵脩大典萃內外儒臣偁爲總裁官張英公輔征  
交趾辟偁以從多所贊畫歸仍舊官交趾叛謫交州以事忤旨與  
解縉同下獄卒預知終之期先自爲誅偁氣節高勁議論英發少  
銳志於有爲文章雄偉詩有唐人風書法亦妙絕一時解縉稱其  
人品當在蘇長公之列文亦相類至於詩則凌鑠漢唐非蘇所及  
也有虛舟集傳於世祀鄉賢祠子振亦能詩以祖父母死於非命  
累辟不起(舊志參通志)

林達字達道正統甲子以明經赴京考選授感恩訓導未幾丁母憂  
服闋棄官不仕樂方廣名山之勝遨遊賦詩自適著有詩詞序記  
號醜集行世(舊志)

林璣字叔溫文詞精敏天順壬午舉人以母老授電白縣教諭勤於  
課督爲士類所宗母喪服闋授臨安教諭念久歷儒官弗逮祿養  
作永思堂詩以寄哀傷卒年五十七(舊志)

林鳳儀字九成埔垠人後徙居懷安少有逸才而不斤斤繩墨爲諸  
生時喜擊劍工歌詩衆疾其狂舉嘉靖壬子鄉試授瀧水令其治  
民不事文法務在簡易蕩宕必行其意而後已與人交洞見肺腑  
其謀人之急甚於自急有勢出其上必盛氣狎侮之無所屈撓卒



爲法吏中罷歸家四壁立無旦夕之儲賣藥自給意蕭然也詩奇詭放曠不作經人道語名籍公卿間有藏集二十餘卷(舊志)

林宏毅字仲守邑諸生學識淵懿邑令唐學仁慕其才聘修高蓋山志(舊志參陔南齋述聞)

鄔茂材字名山麟洋人由選貢官興國州州判博學能文書法宗鍾繇詩有盛唐遺風著有燕游草海內紀游草東甌草詩評集句墨抄藏於家(舊志)

張文熊字應瑞境子家世醇謹以行義聞於時由貢生授分宜訓導秉禮課士雅有善政未期年卽乞歸督學玉巖周公試閩海秋風賦及浩然歸志論甚見稱賞(參舊志)

永泰縣志

卷九

文苑傳

二十六

張啓睿字有思累舉不售以歲薦歷官沅州通判著有適適軒集子世樑萬歷舉人吉安通判(參舊志)

張啓通字有濟十歲能文由明經謁選得盱眙縣有善政著有青翰集(舊志)

黃璫字基玉號山愚又號愚長白雲人文煥子諸生喜任俠倜儻不羈清初歷官廣東肇羅僉事一載乞歸養居金陵性愛佳山水以吟咏自豪爲詩縱橫有法度與許友齊名兼工畫喜作幽蘭奇石皆有生氣著有姬山集岱遊草西江日譜楚澤孤懷(見通志府志黃氏家譜)

清



黃任號莘田自號十硯翁白雲人省居光祿坊弱冠舉於鄉屢上春官不第匆匆捧檄得粵之四會令莘田故名士無俗吏齷齪態坐是爲上官所不喜劾其縱情詩酒不理民事拂衣歸里宦橐蕭然惟端坑石數枚詩束兩牛腰而已初上公車學詩於新城王漁洋後遊吳越與顧俠君湯西涯姜西溟交而其詩益進所居矮屋三間花竹秀野圖史縱橫飲饌裙屐間有雅人深致以詩名天下蒞粵時飾吏事以經術脩復潰隄全活飢民招徠鹿泊塘巨寇讞高要疑獄均有聲政界但以詩掩耳著香草齋集秋江集青葱韶蒨務去陳言悱惻處能移人情又享大年乾隆壬午重宴鹿鳴閩人士推魯靈光焉（節錄先正事畧全閩詩錄陔南齋述聞）

張其杰字白徵康熙間布衣工詩（見全閩詩錄）

王陽開字周侯號東溟性情真曠不名一能而尤深於詩舉乾隆庚午孝廉十上公車不第謁選得河南獲嘉縣改授教職晚司教仙游訓士課子之暇躡險追幽遍覽全邑之勝仙之鯉湖麥斜菜溪昔人所稱三奇陽開屐齒所經輒形吟咏有三奇游草行世又有東溟隨筆二卷多記閩中遺事

王希聖號袞山赤岸人應乾隆十六年分歲貢爲詩文獨抒性靈不斤斤摹法前人嘗曰措大矻矻窮年徒以一經老牖下以八股博世資不大斗筭耶顧力穡不逢年屢獻屢別歷十三科而志未嘗少懈凡勝必造凡造必文若詩游此心於活潑潑地不崖岸不圭



角而精明嚴毅有過人者有蒼玉山房遺草（見韋治雜錄王氏家譜）

董三錫字世晉久困諸生進退得喪無所介於其心爲詩純古冲淡軼出埃壒之外有集未梓（見全閩詩錄斲輪集）

黃惠字成迪號心菴白雲人任從子乾隆甲戌進士授高安知縣權通判瑞州勸高民樹木濬塘清除邑四達道經畫漏澤園至再三分修福建通志福州府志著餘事齋詩藁（見螺溟錄）

李友松號雪軒金沙人乾隆壬子舉於鄉埋名牧豎時或矢口成詩與牛背笛聲相應嘗有童子軍數輩鍛羽旋里肆口謾罵盲學憲不識文字者李手牛鞭從牧場上肅候之因詢院試文題諸童以

永泰縣志

卷九

文苑傳

二十八

牛蹄馬蹄對蓋蹄題同音以李時牧牛故作惡謔也李唯唯而退卒不肯自道姓字著有百家姓評註雪軒詩文藁

黃虞世號韶庭任從子少師事莘田與謝古梅游心水諸先生胚胎濡染學益進家有凌滄樓藏書萬卷多曹徐謝及鹿山等家藏秘本遂棄舉子業日枕藉其中所居有凍井自號凍井山人有凍井山房詩集行世

力繩武鳳滌人郡廩生性嗜讀見解邁往著永陽石刻考一卷閩學派考四卷（見力氏家譜）

陳元封字紹鎮號韋治縣治人乾隆乙卯舉人世承家學多識前言往行與同里鄭汝霖齊名書法尤秀勁有韋治雜錄四卷行世子



宗壽字純嘏舉嘉慶戊辰鄉榜少受業於憲窩其父常言曰是兒跡弛非憲窩不能爲之師著搜神錄

鄭汝霖號鐵侯縣治人學問文章皆有以自見工八分尤精篆刻登乾隆乙卯鄉榜受知於制軍喀爾準與省會陳恭甫趙毅士諸名流相友善家有萬鑑堂鐵倚樓藏書之富甲一邑所著有胞閩山莊詩集

陳瑩號玉如道光壬辰舉人學殖淹博行文走筆如飛不假思索人多樂從之游裁成後進不少性善飲每霜晨月夕輒陶然手一樽自娛醉後對客揮毫天趣灑然流溢楮墨有鳴秋集詩草及文集兩卷

永泰縣志

卷九

文苑傳

二十九

何桂林號小山少穎異過目不忘父質亦儒學督之嚴十五歲通三禮三傳出就外傳受業於陳憲窩憲窩邑名宿博覽羣書著作林立得小山喜曰成我志者子也小山由是益專志墳典道光丙午舉於鄉著述隆富悉災於火所存者僅日纂類編六十八卷掌教景行四十年陶成後進最著者則如廖松青張定遠諸子子兆魁邑明經亦淵博能文

黃圖南號滄秋白雲人爲文瞑坐半頃舉筆疾書無所更攢而辭意淵澹雋永人亦如之登咸豐癸丑進士累官翰林院編修日講官左庶子督學貴州有率真集行世(見雲癯偶訂)

力大懋鳳縈人歲貢生學養兼至掌教屏南雍容風議一納於禮著



賞齋詩集四卷四書說四卷

侯宣治號芷溪以明經官廣文冷署青氈無寒酸氣故見之咏歌者不流入苟且耳目之玩有十笏山房詩集閩縣龔易圖以抑而不愁順而不蕩稱之(見哦松齋詩話)

王輝章號鉅相赤岸人學問閎粹爲世儒碩咸豐乙卯闈卷擬魁多士以字句間小疵抑置副車第一人其治身自起居衣服壹意恭肅比司教鐸五至建溪兩泝汀水左右圖史寒暑弗釋卷雖言恂恂不出口而譚理析疑灑若炙輠諸生習聞王名爭欲就以受業學舍如蠶房不能容與張蓉峰夢元爲莫逆交蓉峰藩閩折柬招之不得見俸入或勸爲子孫計者曰自古豈有豐嗇我爲政者耶

永泰縣志

卷九

文苑傳

三十

子孫命亨宜自振吾知道吾意已耳著紺珠集布帆無恙集緣情集(見王氏家譜)

林步賢號景夫白雲人同治乙丑副貢嘗謂韓昌黎文讀之增士夫氣魄韋蘇州詩簡淡靜穆可以清心寡欲朱菽原有言愛之深故學之至學之至故言之親切而有味不覺其與爲一也觀景夫詩文良然

廖松青字天德號心夫湯泉人九歲從林生白遊詒爲異才年十四擬王氏菑園銘奧峭似子書藝林中以大器目之能詩工詞曲每脫藁人爭傳誦幾於一時紙貴屢躡秋闈晏如也同治丁卯始舉孝廉聞報未兩月卒遺詩一百五首藏其甥黃梅家



江翊甫號贊欽莒口人光緒辛卯中式副榜學深力宏才如奔馬下筆輒千餘言而尤長於韻學所居尺五樓極溪山之勝酒酣耳熱言論英發悉闢町畦得力山水居多嗣游幕江左抑塞無聊之概一寄之詩歌著有龍山堂詩集若干卷文鈔一卷

蘇松堅號心如十都豐寧山人性凝重以莊見憚後生小儒輒望而畏之嘗自比東坡酒趣吟腸亦時相彷彿應光緒辛卯恩貢著畫鳴錄倚松書屋雜纂

黃英號菊人東關外龍江園人以廩生餼滿貢太學品純而學有根柢謹事繼母友愛兄弟和藹之氣溢於門庭治訓誥十年於六書最精福清陳維倫貢士聞其名延課子弟後在東湘授徒數年聲

譽籍甚天懷澹宕家中落不屑屑圖米鹽生活自詩鐘之戲盛行角勝吟壇每作輒數十聯或百聯不止又不自定其優劣必遍錄之以聽主持風雅者之甲乙每花晨月夕與朋儕團坐高唱竟忘厨中之無以爲炊也掌教景行未幾而學堂興書院竟廢生平著述雖未付梓儀其人者以弗獲快觀爲憾而博聞強識同輩中固首屈一指云

王夢熊號錫侯赤岸人幼不好弄坐立必莊及長質樸多古人意不作誑語不爲畸行人有以疑僞嘗者有作色相加者第覺之不校爲文幽峭似子而近體又蘊藉宜人閱者疑出兩手選宣統己酉拔貢著是亦軒文詩鈔卒年四十一



論曰有嗜欲然後有性情有性情然後有文字宣德於廟堂之上君子以之落其根寄意於草野之下小人以之獵其蕃蒐目匯心忱腎鏤肝發之以才著之以言才而毗於陽與剛也其言如霆如電如長風之出谷如崇山峻厓如決大川如奔騏驥其光也如杲日如火如金鏐鐵其於人也如君而朝萬衆如鼓厲勇士而戰之才而毗於陰與柔也其言如升初月如清風如雲如霞如煙如幽林曲澗如淪如漾如珠玉之輝如鴻鵠之鳴而入寥廓其於人也愜乎其如嘆邈乎其如有思盎乎其如喜愀乎其如悲文不同而可傳同可傳不同而人以文傳固罔不同夫文與文相續而成句亦文與文相生而成篇口所不能達者文能曲傳之故文者所以

代口而傳之千百世者也工文者傳之千百世不啻其口出而千百世之人傳之亦不啻口出也卽文徵人猶人之軀幹壯強薄弱不可得而知而文則其身之血氣也血氣誠不可以言軀幹然舍血氣而軀幹胡以附麗談軀幹者又焉能置血氣不一叙及乎世動謂讀聖賢書當先立其大不當馳騫於聲律藻繪之末是相人之法有二在骨者固詳審食息起居之微在表者遂不問其五官百骸之著也無血氣何以運軀幹舍文何以觀人載道謂之文言以人重文固不朽也道之散見謂之文不以人廢言文亦不朽也均之皆立名不朽也東坡云文章如金玉各有定價先後進相汲引因其言以信於世則有之矣至其品曰高下蓋付之衆論決非



一夫所能抑揚信夫

永泰縣

志

卷九

文苑傳

三十三